

## **Rhif 397 - Beirniadaeth Rhyddiaith Bl 10 ac 11 (D) Mae gen i farn.**

### **Beirniad – Emrys Wynne**

Wrth bwysu a mesur y darnau a gyflwynwyd, roeddwn yn chwilio am strwythr gadarn wrth i'r ymgeiswyr osod eu safbwyntiau ar amrywiol destunau. Diolch i'r ymgeiswyr am gystadlu a dymunaf pob llwyddiant iddynt yn eu gyrfaedd yn y dyfodol. Gobeithiaf yn arw y bydd pob un ohonynt yn cael cyfleoedd yn y dyfodol i ddatblygu eu doniau i gyfansoddi gwaith ysgrifenedig pellach.

Mae cywirdeb iaith o ran cystrawen a defnydd o idiom yn bwysig er mwyn gallu cyfleu barn glir. Er hynny, rhoddais yr un pwyslais i'r cynnwys ac a roddais i gywirdeb iaith.

Mae tri yn cyrraedd y brig. Mae MO SALAH yn pwysu a mesur dadleuon o blaid ac yn erbyn mynychu Coleg neu Chweched Dosbarth ar ôl TGAU. Tra'n cefnogi ei safbwyntiau gyda pheth tystiolaeth, ni lwyddodd yr araith i fy narbwyllo o farn bersonol yr ymgeisydd. Roedd ansawdd yr iaith yn amharu ar rediad yr araith yma ac acw.

Yn ei lythyr at y Prif Weinidog, mae EDWARD yn poeni am ddigartrefedd. Roedd ôl ymchwil yma gyda barn yn cael ei chefnogi gyda thystiolaeth megis costau sydd ynghlwm wrth ddigartrefedd. Gan mai llythyr ffurfiol sydd yma, yn trafod un maes penodol, efallai na roddodd yr ymgeisydd gyfle têtg i'w hun i ddatblygu rhai pwyntiau ymhellach ac i grynhoi ar y diwedd.

Mae ROBIN HOOD yn defnyddio technegau areithio yn effeithiol gan ddal sylw'r gynulleidfa o'r cychwyn. Amrywia hyd y brawddegau yn effeithiol a thaflla ambell gwestiwn rhethregol i'r araith, yn ôl y galw. Mae strwythur pendant i'r gwaith a barn yr ymgeisydd yn cael ei gynnal yn gadarn trwy gydol y cyflwyniad. Cefnogir y farn â thystiolaeth a datblyga bwyntiau yn bwrpasol ac yn effeithiol. Rhaid hefyd canmol cywirdeb yr iaith.

1af - ROBIN HOOD; 2il – EDWARD; 3ydd – MO SALAH.